

Date – 08/07/2026

Time - 7:30 -7:40 Hrs

AKASHVANI AIZAWL
REGIONAL NEWS BULLETIN
HEADLINES (MORNING)

1. Farkawn rama Lamsial Puka ruhro kum zat chu zir chian a nih hnuah kum AD 1729 atanga 1789 inkara mi a ni tih chhut chhuah a ni.
2. Mizorama a vawi khatna turin 4-Star Hotel changlung taka siamna tur inremna ziah a ni.
3. Kerala-a Wayanad-a leiverh hnathawhna hmuna leimin avangin mi pathum an thi
4. Fifa World Cup Round of 16 inkhelah nizan khan Argentina leh Switzerland te chakin quarterfinal an lut.



CARBON DATING

Lamsial Puka ruhro kum zat chu chhut chhuah a ni a, Uluk taka zir chian a nih hnuah kum AD 1729 atanga 1789 inkara mi a ni tih chhut chhuah a ni.

Mizo Archaeological Society (MAS) chuan Lamsial Puka ruhro hlui awm khawm, Radiocarbon (Carbon-14) dating hmanga a kum chhut tura an thawn chhuah result chu an dawng fel a, Uluk taka zir chian a nih hnuah kum AD 1729 atanga 1789 inkara mi a ni tih chhut chhuah a ni a, Ruhro tam tak awm mah se, zir chian bik hi ruhro pakhat chauh a nih avangin kum AD 1729 atanga 1789 inkara mi vek an ni tihna a ni lo a, Lamsial Puk hi Champhai District chung, Farkawn rama awm a ni.

MAS hian Lamsial Puka mihring ruhro sample pakhat lain Florida, Miami-a inbun Beta Analytics hnenah Carbon-14 dating hmanga a kum chhut turin an thawn a. MAS hian Carbon-14 dating tihna tur sum senso hi kum 2023 khan Art & Culture Department atangin ₹1,50,000.00 an dawng a, Mizo Archaeological Society member-te hi Mizo pi leh pute chanchin mumal taka zir chian tum, zirna leh thiamna kawng hrang hrang nei an ni a. Tun hnaia Mizoram chhunga ruhro leh hmanlai thil hai lan leh lai chhuah hrang hrangte la khawmin an zirchiang thin a ni.

<><><>

ALL PARTY MEETING

Political Party hrang hrang awihten Special Intensive Revision 2026 kalpui meka Draft Electoral Roll tlangzarh taka kum 2025 Electoral Roll-a chuang zinga kum 2005-a zawmpui nei lote chu Roll atanga paih tha an ti.

Adviser to CM Pu Lalmuanpuia Punte kaihhruaia All Political Party Meeting New Capital Complex Civil Secretariat Conference Hall-a neihah he thu hi an rel a, meeting-ah hian political party tinte chu an aiawh mi 3 aia tam lo theuh tel tura sawm an nih angin - BJP, Congress, MNF, ZPM leh PC party aiawhte an tel a ni.

Political party 5 aiawhte thukhawm chuan resolution 4 an pawm a, chungte chu - SIR 2026 Draft Roll lo chhuaka kum 2025 e-roll a chuang si, 2005 e-roll a zawmpui nei lo 'No linkage with last SIR' category a awm chhinchhiahna sen a awmhote chu a nihna ang taka paih vek te, chhinchhiahna enga chuang, rinhlelhawm deuha langte fimkhur leh uluk taka All NGO-te nen umzui te, SIR 2026 kal mekah Party tin ten lungrual taka hmalak a, inrawntawwna neih zel leh, SIR 2026 chungchanga All NGO-te hmalakna tha an ti a, an thlawp thute an tarlang a ni.

Thutkhawmah hian SIR, 2026 Draft Roll tlangzarh tâka voter belh leh paih chungchanga hmalak dan turte ngaihtuahin, hmun danga pem tawh si, electoral roll-a la delete loh mi 13,978 an lo awm te, electoral roll-a chuang nawn mi 2,248 an awmte chuan ngaihtuahna a tih thui thu an sawi a; Electoral roll dik leh felfai tak neih a nih theih nan leh India khua leh tui dik tak chauh electoral roll-a an chuân theihna tura thawktute tawiawm leh lungrual taka hmalakho ni se, an ti a ni.

<><><>

TAXATION DEPT

Sorkar kum kal mekah Mizoram Taxation department chuan thla 3 - April atanga June thla chhung khan chhiah cheng vbc 381 a hmu a; chhiah hmuh tam berna Goods & Services Tax (GST) atangin cheng vbc 273 hmuh a ni.

Mizoram Taxation department-in chhiah an hmuh zat an tarlan danin, sorkar kum kal mek 2026-27 ah hian sorkar kum intanna April thla khan chhiah cheng vbc 209 hmuh niin a tam ber thla a ni a; May thla khan cheng vbc 92 leh June thla khan cheng vbc 79 hmuh niin, June thlaa hmuh hi sorkar kum kal mek thla 3 chhunga chhiah hmuh tlem ber thla a ni.

Petrol leh Diesel atanga sorkarin chhiah alakna Road Maintenance Cess leh Social Infrastructure & Services Cess atangin sorkar kum kal mekah cheng vbc 14 ve ve hmuh a ni tawh a; kumin April thla khan cheng vbc 12 hmuh niin a tam ber a, May thla khan cheng vbc 1 leh thla liamta June thla khan cheng nuai 63 hmuh a ni thung.



CHALTLANG TOURIST LODGE

Mizorama a vawi khatna turin Chaltlang Tourist Lodge awmna hmunah 4-Star aia hniam lo Hotel changtlung taka siamna tur inremna ziah a ni.

“Development of 4-Star or Higher Category Hotel at Tourist Lodge, Chaltlang, Aizawl, Mizoram on Design, Build, Finance, Maintain, Operate, Manage & Transfer (DBFMOMT) Basis” hnuaia Tourist Lodge, Chaltlang 4-Star aia hniam lo hotel dinna tur Concession Agreement chu nimin khan Tourism Department, Government of Mizoram leh M/s Hotel Polo Towers Ltd., Shillong, Meghalaya-ten an ziak a, Inremna hi Chief Minister’s Office-ah ziah niin State sawrkar aiawhin Commissioner & Secretary Pu Vanlaldina Fanai chuan a ziak a, Company aiawhin Pu Prashant Gupta, Chief Financial Officer & Whole-time Director, Hotel Polo Towers Ltd. in hming a ziak a ni.

Aizawl khawpuiah hian 4-Star emaw a aia chung emaw thlen in tha hi a la awm lo va. Mizoram hi India rama state-te zinga hetiang mikhual thlenna tha nei lo state awm chhun hi nia hriat a ni. Hei vang hian Mizoram sawrkar chuan Chaltlang Tourist Lodge tihchangtlun hi thain a hria a, Hotel Polo Towers Ltd nena inremna hi siam mah se a hmunhma hi sawrkar ta a la ni reng dawn a, PPP Mode-a kalpui tur a ni ang.

<><><>

DEPUTY SPEAKER

Deputy Speaker Pu Lalfamkima’n sawrkar puihna chu a thlawna hmuh mai ni lova, eizawnna tihpuitlin nan leh thawhrim rah seng theih nana hmang tangkai turin mipuite a chah.

Nimin khan khan Pangbalkawn ah Community Hall leh Village Organization (VO) House hawnna leh hlo thlawhna khawl (Brush Cutter) sem chhuahna hun a hmanpui na ah he thu hi a sawi a, Pu Lalfamkima chuan PMKSY hnuaia hmalakna mipuiten an hmang tangkai chu lawmawm a tih thu a sawi a. Sawrkarin kuthnathawkte leh hmasawn tumte puihna a pek thin chu hmasawnna atana kawng pawimawh tak a nih thu a sawi.

Pu Lalfamkima chuan sawrkarin hmasawnna a din hrang hrang hmang tangkai tur leh hmachhawp a neih chu khawtlang hmasawnna atan hmang thiam turin a chah a, mipuite chu intodelh tum tura chahin hmasawn zel tum turin a sawm a ni.

<><><>

GAS

Supply Department chuan harsatna hrang hrang thleng thei laka an him theih nan mipuite chu Gas pipe tha hmang turin an chah.

Supply Department chuan, ram chhung hmun hrang hranga eirawngbawlna Gas vanga chhiatna thleng tam ber chu a hmangtu lam inthlahdah vangte, Gas chungchang inhrilhriatna an neih tawk loh vangte, hmanraw hman tur dik tak, Oil Company ten hman tur an tih ang an hman loh vang leh hmanraw him tawk lo an hman thin vang a ni tlangpui tih hriat a ni a. Heng harsatna awm thei hrang hrang Mizorama zirchian a nih hnuah LPG Consumer-ten ISI marked chuang ni lo Gas pipe, man tlawm zawk an hmang tam hle tih hriatchhuah a ni tih an sawi.

Hetianga hmanraw tha tawk lo leh him lo hman hian chhiatna nasa zawk a thlen theih reng avangin Mizoram mipui, gas hmangtute chu Gas pipe tha leh Company pawmpui ngei hmang ngei turin an ngen a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.



HIV/AIDS AWARENESS

HIV/AIDS do kawnga chak zawka hmalak dan tur inrawnkhawmna chu nimin khan Aizawl DC Pisa puiah neih a ni.

Inrawnkhawmna ah hian Addl DC Pu Zoramsiama Hmar chuan thalai leh kum naupang zawkte zingah nasa zawka mipuite zirtirna leh hrilhhriatna kalpui a pawimawh thute, HIV hrik pai ten enkawlina tha taka an lak theih nan, HIV hrik pai te thinhrikna leh diriamna kan paihbo a hun tawh thu a sawi.

Inrawnkhawmnaah hian HIV chuan thliar bik neilovin mipui nawlpuiah a luh tawh thu leh tualchhungah nasa taka adarh kual tawh thu tarlan a ni. HIV hrik pai hmuhchhuah zingah za zela 76.3% zet te chu mipat hmeichhiatna atanga kai an nih thu leh HIV maibakah Dâdu (Syphilis) vei pawh an tam thu tarlan a ni.



SIAHA REFUGEE

Siaha District ah Myanmar raltlante tana mitnote enna Bio-Metric enrollment kalpui chu hmawrbawk tawh niin, raltlan 2925 an awm mek a ni.

Siaha District Disaster Management and Rehabilitation department a thawktute hnen atanga thudawn danin Myanmar raltlan te tana BioMetric endikna kalpui chu hmawr bawk tawh niin, tun dinhmunah Refugee Relief Camp sawmhnih pakhat (21) awm mekin, raltlan hi an vaiin sang hnih za kua sawmhnih panga (2925) an awm mek a. Heng zinga 819 chu Mipa an ni a, Hmeichhia 942 leh naupang kumtlinglo 1164 an awm a, mi 2328 hi refugee camp-a awm an ni a, mi 597 erawh camp pawn ah inluah leh chhungte bulah awm an ni thung a ni.

<><><>

KERALA

Kerala-a Wayanad-a leiverh hnathawhna hmuna leimin avangin mi pathum an thi. Ruahsur nasa vangin Meppadi-a leiverh laia hnathawktute chu leimin hian chhilhin mi pakua chu dama chanchhuah an ni a, midang paruk chin hriatloha awmte chu zawn mek an ni bawk. Chhanchhuah hna hi Fire and Rescue Services leh disaster response agency ten an thawk mek a. Keralam State Disaster Management Authority (KSDMA) sawidanin leiverhnaa leivung chhekkhawl chu ruahsur nasa avang hian a tawlh a. A bulhnaia lirthei thahnem tak leimin hian a chhilh bawk a ni.

Wayanad ah hian nimpiniah atang khan ruah a sur nasa hle a. Wayanad leh Kozhikode district-ahte mipuite fimkhur tura hriattirna red alert puan a ni.

Lok Sabha Leader of Opposition leh Wayanad atanga MP atana thlan Rahul Gandhi chuan chhiatna thleng chu pawl atih thu leh mitthi chhungte a tawrhpu thu social media ah a tarlang a. Congress leh UDF mi leh sa te chu tanpuina hna theihtawpa lo chhuah ve turin a sawm a ni.

<><><>

WC

Fifa World Cup Round of 16 inkhelah nizan khan team ngaihven hlawh Argentina chuan Egypt 3-2 in an hneh a. Columbia leh Switzerland te goal awm lova an inhnehtawk hnuah Penalty shootout hmangin Switzerland an chak. World Cup quarterfinal intum turte tihchian a ni ta a. Zirtawpni zingah Quarterfinal Match hmasaberah France leh Morocco an intum dawn a. Zirtawp zan dar 12.30 ah Spain leh Belgium an intum ang a. Norway leh England te Pathianni zing dar 2.30 ah leh Argentina leh Switzerland te dar 6.30 ah an intum ang.

